

Denâ (Natale)

Vintiquattro de dexembre.

di Daniele Caviglia

L'invexendo da çitæ o ghe faxéiva vegnî l'axillo. E stroeppe de scignoe, figge e figette arembæ a-e vedriñe, e luxe che resciaèivan e stradde ùmie into scùo da séia e abarlugàvan o cœ, o fô do tràfego e i fummi veninosi di scapamenti, e sorvetutto l'anscêtæ universale d'acatâ, de demoâse e de mangiâ e béive l'impìvan de gödimento e de presumî.

Sciben o l'avéiva mâ de testa.

"Crestiaen?! Da chî à 'n pö manco ciù de nomme! S'ascòrdan chi i son, i amixi, amoî, doveî, e fiña perchè o l'è festa, comme se scenta a neve cæita in mâ", o diva tramezo à 'n fatoriso sbiâscio e 'na giastemma.

L'ea dex'oe. A gente a l'ea ciù ræa. Se seràvan inte caze à compî a mezua da giornâ.

E a raggia a ghe montava a-a goa, contra quelle figùe che, dòppo tutti i sò sfòrsci, gh'avéivan ancon un sciòu de vitta, a poscibilitæ de 'na speansa.

O ghe pàiva d'avei 'n toneo ch'o ghe sciaschese o crânio.

"Devo adormîghe tutti i sentimenti! Devo riescî à fâghe dî de longo « Na, na, na ! No çe comprichemmo a vitta con l'atençion pe 'n figgeu pövio, pe 'n vegio maròtto... ! » , e moian, liatri ascì, à sta mainea, dixendo de na! "

E o mâ de testa o l'ea divegniùo 'n crîo.

Quarchedun, ascì di zoeni, o l'ea lì aprœvo scin a-andâ in gexa pe-a fonçion.

"Poscibile che tutti i anni a finisce coscì...?!", e o dava a corpa à quella figgia: lê a l'avéiva dito o scì o ciù incredibile de l'istöia.

E tanto l'ea o mâ e o venin, ch'o no poéiva manco ciù pensâ a-o sò nomme, a-o nomme de Maria.

